



Minggu, 22 Januari 2023

Ogen: Kejadin 3:16



“KU-tambahi Kiniserandu”



Dosa mpeturah ate mesui; dosa mpeturah perubaten ras perjengilen; dosa mpeturah la siangkan; dosa ndarami kesalahen kalak sideban gelahna teridah kita benar; dosa erbahansa kita ndauh sirang ras Dibata, dosa erbahan kita mela, dosa erbahan kita jadi kalak egois, dosa mpeturah biak cian, dosa erbahan kita rate mesui janah dosa mpeturah kiniseran-kiniseran simbaru i bas kegeluhen. Salah sada kiniseran si ialoken Hawa eme mesui iakapna tupung mupus ras metedeh atena rusur nandangi perbulangenna.

Tupung manusia erbahan dosa ditambahi Dibata kiniseran-kiniseranna. Misalna: adina nangko kita jenari tereteh kita nangko, kiniseran sipemena kel si aloken e me mela jenari datken sangsi sosial; entah pe adina erbual kita jenari tereteh kita erbual, kinineran pertama siialoken e me kalak lanai nari tek nandangi kita janah mesera ka si akap lako erbahan kalak tek erkiteken kita pernah erbual; adina nokoh kita (perbinaga), kiniseran si ialoken kita e me kurang kalak reh ku kiosta inganta erbinaga, entah pe adina kita terdat erlua-lua, kiniseran siialoken kita e me mela, iasingken jenari putus hubungan ras keluarga. Artina adina kita erbahan dosa ras kesalahen, Tuhan tentuna nambahi kiniseran-kiniseran ku tengah-tengah geluhta. Adina kita ngulah upahta eme ukumen tapi adina kita nggeluh bagi sura-sura Dibata upahta eme keriahen ras kemalemén ate.

Nggeluhlah kita bagi singena ate Tuhan gelah mejuah-juah kita, dame pusuhta, ijujurken Dibata pasu-pasu si mbelin man banta. nggeluhlah kita alu erdame ras tinepa Dibata sideban gelah si dat keriahen erkiteken lingkungan/daerah inganta tading pe sikap erkiteken sijaga ras sirawat.